



# Bouxboux Simhai Danqhaenh Dangj

## 大家开心赞美党

□ Veiz Suzyingh / 韦淑英

Moegmienx va hai lumj feiz hoengz,  
Lwglan Bouxcuengh gyaex ciengq go,  
Angq ciengq hungmbwk seizdaih moq,  
Angq ciengq Cunghgoz gyaex youh lengj.

Haemhlwenz ninz ndaek baenzhwnz loq,  
Hai sing ciengq go goksasa,  
Ciuhneix guh vunz caen siusaj,  
Couh lumj mbungqmbaj mbin luhleh(cwxcaih).

Ngoenzneix dangj raeuz gvaq ngoenzseng,  
Beixnuengx doxceng hwnj godaiz,  
Raeuz caux beijfwen miz haujlai,  
Bouxboux simhai danqhaenh dangj.

It gouj ngeih it youq seizhah,  
Lajmbwn lajdeih doengzcaeaz gaeuj,  
Duzlungz baihdong fwt ngiengxgyaeuj,  
Hoenzfeiz hwnjdaeuj haunengqngengq.

Gyahhingh Nanzhuz hai daihhoih,  
Doengh boux doengzdoh sim angqyangz,  
Laebbaenz Cungguk Gungcanjdangj,  
Vunzlai miz gangj youh miz riu.

Couh youq ngoenzhaenx dangj laebbaenz,  
Sikhaek sim haen naemj gouq guk,  
Vih gyoengq bouxhoj bingqmingh buek,  
Ngoenzlaeng Cungguk cij miz muengh.

Mbouj lau lwed lae caeuq gyaex doek,  
Mbouj lumz simgoek caeuq sawjmingh,  
Gwzming itdingh yaek guh hingz,  
Hawj gyoengq beksingq gvaq ngoenzndei.

Fwnfwn rumzrumz bak bi daeuj,

Beksingq yied gaeuj sim yied hai,  
Vunz gungcanjdangj ceiq ndei lai,  
Mbouj lau mingh dai bae buekguh.

Fanjdung seiqlig ceiq rwixvaih,  
Cungq mid doiqdaih aen dangj raeuz,  
Gaj vunz couh lumj gaj duzbaeu,  
Biengzdeih lwed haeu mbwn laepyaenz.

Vunz gungcanjdangj mbouj lau dai,  
Daiqlingx vunzlai hwnjdaeuj hoenx,  
Bungz daengz feizmbaw caeuq raemxgoenj,  
Ciuqyiengh bae coemj mbouj doiqlaeng.

Ginggvaq haj baez fanj humxhoenx,  
Dangj raeuz sonjaet vunz cien fanh,  
Sienghyangh Canyiz engq hojnanh,  
Hungzginh bet fanh yaek bae caez.

Cij lw hungzginh sam fanh lai,  
Doeklaeng youh hai bae baihbaek,  
Gwn hoj gwn nanh deng caeg gyaep,  
Bogfeiz yaek ndaep youq gyang roen.

Cienz baengh Cungguk Gungcanjdangj,  
Guh dongh bae dangj hoj caeuq nanh,  
Daiqlingx hungzginh daengz Yenzanh,  
Geijlai hojnanh gangj mbouj caez.

Miz dangj guh dongh cij ndaej hingz,  
Cungguk gwzming hwnj daihlloh,  
Gyaep fangz Yizbwnj ok Cunghgoz,  
Ganj gozminzdangj bae Daizvanh.

Cungguk bouxminz ndaej gaijfang,  
Baengh gungcanjdangj daeuj dazyinx,

Gouq raeuz bouxhoj lauxbeksingq,  
Gij aencingz de sang gvaq mbwn.

Daengx guk gaijfang guh gensez,  
Gij goenglauz de vunz geiq ndaej,  
Vih guk vih minz bae naemjngeix,  
Hawj gwnz biengzdeih caez vuenyungz.

Gaijgwz hailangh yamq hwnj din,  
Dangj vih bouxminz roengz goengfou,  
Yungh caenh ligliengh bae fwndou,  
Duetgungz baenzfouq minz angqyangz.

Banggunz gunggeng hai loh gvangq,  
Baengh gungcanjdangj ok caencingz,  
Mboujguenj lajmbanj rox ndawsingz,  
Ngoenzneix bouxminz yienghyiengh lengj.

Lajmbanj nungzyez caeuq nungzminz,  
Dangj ceiq yunghsim sam yiengh neix,  
Raemx dien goengloh cungj guh caez,  
Vunzmbanj sim maez bae codciuh(daengxcuih).

Faex hung roq gyong yiengj gongzgangz,  
Va hoengz hai rang rim biengzdeih,  
Baengh gungcanjdangj ok simgyaez,  
Vunzlai doengzcaeaz bongh siujgangh.

Dangj Cibgoujdaih lumj feiz oq,  
Hai diuz loh moq baefaenfaen,  
“Song aen bak bi” dingh guhbaenz,  
Cungguk engq haenq youq lajmbwn.

Gomiuz hungmaj baengh raemxraiz,  
Gova angjhai baengh ndit daeuj,  
Ngoenzneix swnghhoz van youh raeuj,  
Cienfanh mbouj lumz dangj aencingz.

# Hoh Dangj Raeuz Bak Bi Ngoenzseng

## 恭贺我党百岁生日

□ Vangz Gozgvanh / 黄国观

**Sai:**

Nuengx youq rog dauqlaeng,  
Raeuz doxyaeng fwendoiq,  
Raeuz beixnuengx habhoih,  
Doiq gijmaz fwen ndei?

**Mbwk:**

Okrog baenzneix nanz,  
Ngoenz dauqranz bungz beix,  
Fwen yienghyiengh cungj ndei,  
Youz beix daiq eu gonq.

**Sai:**

Dangj laeb yaek bak bi,  
Miz goenglauz lailai,  
Hawj beksingq fatcaiz,  
Raeuz wnggai goenghoh.

**Mbwk:**

Dangj laeb yaek bak bei(bi),  
Seiqlengq vunz goenghoh,  
Byaij haeuj seizdaih moq,  
Goenghoh dangj yinghmingz.

**Sai:**

Dangj lingjdauj beksingq,  
Gekmingh vih daihgya,  
Doifan sam goengq bya,  
Raeuz danggya guhcawj.

**Mbwk:**

Doifan sam goengq bya,  
Danggya guh bouxcawj,  
Saedceij ngoenzngoenz ndei,  
Bouxboux ngeix daengz dangj.

**Sai:**

Guh gaijgwz hailangh,  
Dwg dangj raeuz yinghmingz,  
Duetgungz guh ndaej hingz,  
Hawj beksingq fatcaiz.

**Mbwk:**

Gungcanjdangj yinghmingz,  
Hawj beksingq fatcaiz,  
Daiqlingx raeuz vunzlai,  
Byaij hwnj loh siujgangh.

**Sai:**

Byaij haeuj seizdaih moq,  
Daiq loh hix dwg dangj,  
Goengcik baenzneix angj,  
Bouxboux angq raixcaix.

**Mbwk:**

Bak bi neix gvaqdaeuj,  
Bienq aen yienghsienq moq,  
Dangj baihnaj daiq loh,  
Gyoengqraez doq bae riengz.

**Hab:**

Gungcanjdangj lingjdauj,  
Gauj yienghyiengh cungj doeng,  
Gungcanjdangj daiq roen,  
Baenzgoeng youq baihnaj.